

四庫全書

集部

欽定四庫全書

東坡全集卷十四

宋 蘇軾 撰

詩七十九首

岐亭五首

并叙

元豐三年正月余始謫黃州至岐亭北二十五里山上
有白馬青蓋來迎者則余故人陳慥季常也為留五日
賦詩一篇而去明年正月復往見之季常使人勞余於
中塗余久不殺恐季常之為余殺也則以前韻作詩為

殺戒以遺季常季常自爾不復殺而岐亭之人多化之
有不食肉者其後數往見之往必作詩詩必以前韻凡
余在黃四年三往見季常而季常七來見余蓋相從百
餘日也七年四月余量移汝州自江淮徂雒送者皆止
慈湖而季常獨至九江乃復用前韻通為五篇以贈之
昨日雲陰重東風融雪汁遠林草木暗近舍烟火濕下
有隱君子嘯歌方自得知我犯寒來呼酒意頗急拊掌
動鄰里遶村捉鵝鴨房櫬鏘器聲蔬果照巾幕久聞萋

蒿美初見新芽赤洗盞酌鵝黃磨刀削熊白須臾我徑
醉坐睡落巾幘醒時夜向闌唧唧銅餅泣黃州豈云遠
但恐朋友缺我當安所主君亦無此客朝來靜庵中惟
見峰巒集

我哀籃中蛤閉口護殘汁又哀網中魚開口吐微濕剝
腸彼交病過分我何得相逢未寒溫相勸此最急不見
盧懷慎烝壺似烝鴨坐客皆忍笑髣髴然發其幕不見王
武子每食刀几赤琉璃載烝豚中有人乳白盧公信寒

陋衰髮得滿幘武子雖豪華未死神已泣先生萬金璧
護此一蟻缺一年如一夢百歲真過客君無廢此篇嚴
詩編杜集

君家蜂作窠歲歲添漆汁我身牛穿鼻卷舌聊自濕二
年三過君此行真得得愛君似劇孟叩門知緩急家有
紅頰兒能唱綠頭鴨行當隔簾見花霧輕幕幕為我取
黃封親拆官泥赤仍須煩素手自點葉家白樂哉無一
事十年不蓄幘閉門弄添丁哇笑雜吟泣西方正苦戰

誰補將帥缺披圖見八陣合散更主客不須親戎行坐
論教君集

酸酒如蠶湯甜酒如蜜汁三年黃州城飲酒但飲濕我
如更揀擇一醉豈易得幾思壓茅柴禁網日夜急西鄰
推甕盎醉倒猪與鴨君家大如掌破屋無遮幕何從得
此酒冷面妬君赤定應好事人千石供李白為君三日
醉蓬髮不暇幘夜深欲逾垣卧想春甕泣君奴亦笑我
鬢齒行禿缺三年已四至歲歲遭惡客人生幾兩屐莫

厭頻來集

枯松強鑽膏槁竹欲澀汁兩窮相值遇相哀莫相濕不
知我與君交遊竟何得心法幸相語頭然未為急願為
穿雲鶻莫作將雛鴨我行及初夏煮酒映疏幕故鄉在
何許西望千山赤茲遊定安歸東泛萬頃白一歡寧復
再起舞花墮幘將行出苦語不用兒女泣吾非固多矣
君豈無一缺各念別時言閉戶謝衆客空堂淨掃地虛
白道所集

郭祥正家醉畫竹石壁上郭作詩為謝且遺古

銅劍二

空腸得酒芒角出肝肺槎牙生竹石森然欲作不可回
吐向君家雪色壁平生好詩仍好畫書牆浣壁長遭罵
不嗔不罵喜有餘世間誰復如君者一雙銅劍秋水光
兩首新詩爭劍鏐劍在床頭詩在手不知誰作蛟龍吼

龍尾硯歌

并引

余舊作鳳咮石硯銘其略云蘇子一見名鳳咮坐令龍

尾羞牛後已而求硯於歛歛人云子自有鳳味何以此
為蓋不能平也奉議郎方君彥德有龍尾大硯奇甚謂
余若能作詩少解前語者當奉餉乃作此詩

黃琮白琥天不惜顧恐貪夫死懷璧君看龍尾豈石
材玉德金聲寓於石與天作石來幾時與人作硯初不
辭詩成鮑謝石何與筆落鍾王硯不知錦茵玉匣俱塵
垢擣練支牀亦何有况瞋蘇子鳳味銘戲語相嘲作牛
後碧天照水風吹雲明牕大几清無塵我生天地一門

物蘇子亦是支離人
麝言細語都不擇
春蚓秋蛇隨意畫
願從蘇子老東坡
仁者不用生分別

張近幾仲有龍尾子石硯以銅劍易之

我家銅劍如赤蛇
君家石硯蒼壁橢
而窪君持我劍向
何許大明宮裏玉
佩鳴衝牙我得君
硯亦安用雪堂牕
下爾雅箋蟲鰕二
物與人初不異飄
落高下隨風花蒨
緜玉具皆外物視
草草玄無等差君
不見秦趙城易壁
指圖晚柱相矜誇
又不見二生妾換
馬驕鳴啜泣思其

家不如無情兩相與求以為好譬之桃李與瓊華

張作詩送硯反劔乃和其詩卒以劔歸之

贈君長鋏君當歌每食無魚歎委蛇一朝得見暴公子
櫛具欲與冠爭我豈比杜陵貧病叟終日長鏡隨短蓑
斬蛟刺虎老無力帶牛佩犢吏所訶故將換硯豈無意
恐君琬琢傷天和作詩反劔亦何謂知君欲以詩相磨
報章苦恨無好語試向君硯求餘波詩成劔往硯應笑
那將屋漏供懸河

去歲九月二十七日在黃州生子名遜小名幹
兒頎然穎異至今年七月二十八日病亡於

金陵作二詩哭之

吾年四十九羈旅失幼子幼子真吾兒眉角生已似未
期觀所好踰躐逐書史搖頭却黎粟似識非分耻吾老
常鮮歡賴此一笑喜忽然遭奪去惡業我累爾衣薪那
免俗變滅須臾耳歸來懷抱空老淚如瀉水

我淚猶可拭日遠當日忘母哭不可聞欲與汝俱亡故

衣尚懸架漲乳已流牀感此欲忘生一卧終日僵中年
忝聞道夢幻講已詳儲藥如丘山臨病更求方仍將思
愛刃割此衰老腸知迷欲自反一慟送餘傷

葉濤致遠見和二詩復次其韻

濤顛倒元韻

平生無一女誰復歎耳耳滯留生此兒足慰周南史那
知非真實造物聊戲爾煩惱初無根愚愛為種子煩公
為假說反復相指似欲除苦海浪先乾愛河水棄置一
寸鱗悠然笑侯喜為公寫餘習餅壘一時耻

聞公少已悟拄杖久倚牀笑我老而癡負鼓欲求亡庶
幾東門子柱史安敢望嗜毒戲猛獸慮患先不詳囊破
蛇已走尚未省齧傷妙哉兩篇詩洗我千結腸黠蠶不
作蠶未老輒自僵求謝湯火厄冷然超無方

次荆公韻四絕

青李扶疎禽自來清真逸少手親栽深紅淺紫從爭發
雪白鵝黃也鬪開

斫竹穿花破綠苔小詩端為覓檀栽細看造物初無物

春到江南花自開

騎驢渺渺入荒陂想見先生未病時
勸我試求三畝宅
從公已覺十年遲

甲第非真有閒花亦偶栽
聊為清淨供却對道人開
公病後捨宅作寺

張庖民挽詞

東晉巾車令西京執戟郎
甘心向山水結髮事文章
故自輕千戶何曾羨一囊
才高鬼神惡骨朽姓名芳
庾嶺

銘旌暗秦淮舊宅荒吾詩不用刻妙語有黃香

黃魯直
作哀詞

次韻葉致遠見贈

欲求五畝寄樵蘇所至遲留似賈胡信命不須歌去汝
逢人未免歎猶吾人皆勸我杯中物我獨憐君屋上烏
一技文章何足道要言摩詰是文殊

次韻杭人裴維甫

餘杭門外葉飛秋尚記居人挽去舟一別臨平山上塔
五年雲夢澤南州淒涼楚些緣吾發邂逅秦淮為子留

寄謝西湖舊風月故應時許夢中游

次韻段縫見贈

季子東周負郭田須知力穡是家傳
細思種薤五十本大勝取禾三百廛
若得與君連北巷故應終老忘西川
短衣匹馬非吾事只擬闕門不問天

題孫思邈真

先生一去五百載猶在峨眉西崦中
自為天仙足官府不應尸解坐蟲蟲

戲作鮎魚一絕

粉紅石首仍無骨
雪白河豚不藥人
寄與天公與河伯
何妨乞與水精鱗

同王勝之游蔣山

到郡席不暖
居民空惘然
好山無十里
遺恨恐他年
欲款南朝寺
同登北郭船
朱門收畫戟
紺宇出青蓮

荆公宅已

為寺夾路蒼髯古
迎人翠麓偏
龍腰蟠故國
鳥爪寄曾巔
竹杪飛華屋
松根泣細泉
峯多巧障日
江遠欲浮天
略

約橫秋水浮圖插暮煙歸來踏人影雲細月娟娟

至真州再和二首

老手王摩詰窮交孟浩然論詩曾伴直話舊已忘年北
上難陪驥東行且趲船離亭花映肉醉眼鶩窺蓮柁轉
三山沒風回五兩偏荒祠過瓜步古甃墮松巔聞道清
香閣新篴白玉泉莫教門掩夜坐待月流天小院檀槽
闌空庭樺燭烟公詩便堪唱為付小嬋娟

公顏如雪柏千載故依然笑我無根柳空中不待年肯

留歸闕旆坐待逆風船特許門傳籥那知箭起蓮相逢
月上後小語坐西偏流落千帆側追思百尺巔躬耕懷
谷口水石羨平泉茅屋歸元亮霓裳醉樂天行聞宣室
召歸近御爐煙未用歌池上隨宜教李娟

次韻荅寶覺

芒屨竹杖布行纏遮莫千山更萬山從來無腳不解滑
誰信石頭行路難

眉子石硯歌贈胡閭

君不見成都畫手開十眉橫雲却月爭新奇
游人指點小顰處中有漁陽胡馬嘶
又不見王孫青瑣橫雙碧腸斷浮空遠
山色書生性命何足論坐費千金買消渴
爾來喪亂愁天公謫向君家書硯中
小窓虛幌相嫵媚令君曉夢生春紅
毗耶居士談空處結習已空花不住
試教天女為磨鉛千偈瀾翻無一語

以玉帶施元長老元以衲裙相報次韻

病骨難堪玉帶圍
鈍根仍落箭鋒機
欲教乞食歌姬院

故與雲山舊納衣

此帶閱人如傳舍流傳到我亦悠哉錦袍錯落真相稱
乞與佯狂老萬回

次韻滕元發許仲途秦少遊

二公詩格老彌新醉後狂吟許野人坐看青丘吞澤芥
自慙黃潦薦溪蘋兩邦旌纛光相照十畝鋤犂手自親
何似秦郎妙天下明年獻頌請東巡

送金山鄉僧歸蜀開堂

撞鐘浮玉山迎我三千指衆中聞聲教未語知鄉里我
非箇中人何以默識子振衣忽歸去隻影千山裏涪江
與中泠共此一味水冰盤薦琥珀何似糖霜美

送沈遠赴廣南

嗟我與君皆丙子四十九年窮不死君隨幕府戰西羌
夜渡冰河斫雲壘飛塵漲天箭洒甲歸對妻孥真夢耳
我謫黃岡四五年孤舟出沒煙波裏故人不復通問訊
疾病饑寒疑死矣相逢握手一大笑白髮蒼顏略相似

我方北渡脫重江君復南行輕萬里功名如幻何足計
學道有牙真可喜句漏丹砂已付君汝陽璽盜吾何恥
君歸趁我雞黍約買田築室從今始

豆粥

君不見虜沱流澌車折軸公孫倉黃奉豆粥濕薪破竈
自燎衣饑寒頓解劉文叔又不見金谷敲冰草木春帳
下烹煎皆美人萍蘢豆粥不傳法咄嗟而辦石季倫干
戈未解身如寄聲色相纏心已醉身心顛倒自不知更

識人間有真味豈如江頭千頃雪色蘆茆簷出沒晨煙
孤地碓舂杭光似玉沙餅煮豆軟如酥我老此身無着
處賣書來問東家住卧聽雞鳴粥熟時蓬頭曳履君家
去

秦少游夢發殯而葬之者云是劉發之柩是歲
發首薦秦以詩賀之劉涇亦作因次其韻

君看三代士執雉本以殺身為小補居官死職戰死綏
夢尸得官真古語五行勝已斯為官官如草木吾如土

仕而未祿猶賓客待以純臣蓋非古餽焉曰獻稱寡君
豈比公卿相爾汝世衰道微士失已得喪悲懼反其故
草袍蘆簍相嫵媚飲食嬉遊事羣聚曲江船舫月燈毬
是謂舞殯而歌墓看花走馬到東野餘子紛紛何足數
二生年少兩豪逸詩酒不知軒冕苦故令將仕夢發棺
勸子勿為官所腐塗車芻靈皆假設著眼細看君勿誤
時來聊復一飛鳴進隱不須煩伍舉

金山夢中作

江東賈客木絲裘會散金山月滿樓夜半潮來風又熟
卧吹簫管到揚州

次韻周種惠石鈔

銅腥鐵澁不宜泉愛此蒼然深且寬蟹眼翻波湯已作
龍頭拒火柄猶寒薑新鹽少茶初熟水漬雲蒸蘚未乾
自古函牛多折足要知無脚是輕安

次韻蔣穎叔

月明驚鵲未安枝一棹飄然影自隨江上秋風無限浪

枕中春夢不多時瓊林花草聞前語晝畫溪山指後期

豈敢便為雞黍約玉堂金殿要論思

將詩記及第時瓊林宴坐中所言且

約同卜

居陽羨

龜山辯才師

此生念念浮雲改寄語長淮今好在故人宴坐虹梁南
新河巧出龜山背木魚呼客振林莽鐵鳳橫空飛綵繪
忽驚堂宇變雄深坐覺風雷生警欬羨師游戲浮漚間
笑我榮枯彈指內嘗茶看畫亦不惡問法求詩了無礙

千里孤帆又獨來五年一夢誰相對何當來世結香火
永與名山躬井磴

贈潘谷

潘郎曉踏河陽春明珠白壁驚市人那知望拜馬蹄下
胸中一斛泥與塵何似墨潘穿破褐琅琅翠餅敲玄笏
布衫漆黑手如龜未害冰壺貯秋月世人重耳輕目前
區區張李爭姘妍一朝入海尋李白空看人間畫墨仙

徐大正閒軒

冰蠶不知寒火鼠不知暑知閒見閒地已覺非閒侶君
看東坡翁懶散誰比數形骸墮醉夢生事委塵土早眠
不見燈晚食或欺午卧看魀取盜坐視麥漂雨語希古
頗強行少腰脚儂五年黃州城不踏黃州鼓人言我閒
客置此閒處所問閒作何味如眼不自覩頗訝徐孝廉
得閒能幾許介子願奉使翁歸備文武應緣不耐閒名
字挂庭宇我詩為閒作更得不閒語君如汗血駒轉盼
略燕楚莫嫌鑿輅重終勝鹽車苦

蒜山松林中可卜居余欲就其地地屬金山故作此詩與金山元長老

魏王大瓠無人識種成何翅實五石不辭破作兩大尊
只憂水淺江湖窄我材濩落本無用虛名驚世終何益
東方先生好自譽伯夷子路并為一杜陵布衣老且愚
信口自比契與稷暮年欲學柳下惠嗜好酸醎不相入
金山也是不羈人早歲聞名晚相得我醉而嬉欲仙去
旁人笑倒山謂實問我此生何所歸笑指浮休百年宅

蒜山幸有閒田地招此無家一房客

王中父哀詞

并叙

仁宗朝以制策登科者十五人軾忝冒時尚有富彥國
張安道錢子飛吳長文夏公西陳令舉錢醇老王中父
并軾與家弟轍九八存焉其後十有五年哭中父於密
州作詩弔之則子飛長文令舉沒矣又八年軾自黃州
量移汝海與中父之子沆之相遇於京口相持而泣則
十五人者獨三人存耳蓋安道及軾與家弟而已嗚呼

悲夫乃復次前韻以遺沆之時沆之亦以罪謫家于錢塘云

生芻不獨比前人束蒿端能廢謝鯤子達想無身後念
吾衰不復夢中論已知毅豹為均死未識荆凡定孰存
堪笑東坡癡鈍老區區猶記刻舟痕

蔡景繁官舍小閣

使君不獨東南美典刑長記先君子戲嘲王叟短轅車
肯為徐郎書紙尾三年弭節江湖上千首放懷風月裏

手開東閣坐虛明目淨東溪照清泚素琴濁酒容一榻
落霞孤鶩供千里大舫何時繫門柳小詩屢欲書牕紙
文昌新構滿鵝鸞都邑正喧收杞梓相逢一醉豈有命
南來寂寞君歸矣

高郵陳直躬處士畫鴈二首

野鴈見人時未起意先改君從何處看得此無人態無
乃槁木形人禽兩自在北風振枯葦微雪落矐矐慘淡
雲水昏晶瑩沙礫碎弋人悵何慕一舉渺江海

衆禽事紛爭野鴈獨閒潔徐行意自得俯仰若有節我
衰寄江湖老伴雜鵝鴨作書問陳子曉景畫苔雪依依
聚圓沙稍稍動斜月先鳴獨鼓翅吹亂蘆花雪

和王旂二首

旂平
父子

異時常恠謫仙人舌有風雷筆有神聞道騎鯨遊汗漫
憶嘗捫蝨話悲辛氣吞餘子無全目詩到諸郎尚絕倫
白髮故交空掩卷淚河東注問蒼旻

嫋嫋春風送渡關娟娟霜月照生還
逢留歲暮江淮上

來往君家伯仲間未厭冰灘吼新洛且看松雪媚南山
野梅官柳何時動飛蓋長橋待子閒

次韻張晚

新洛霜餘兩岸隆塵埃舉袂識西風臨淮自古多名士
樽酒相從樂寓公半日偷閒歌嘯裏百年暗盡往來中
知君不向窮愁老尚有清詩氣吐虹

次韻王定國南遷回見寄

土暈銅花蝕秋水要須悍石相礮砥十年冰蘖戰膏梁

萬里煙波濯紉綺歸來詩思轉清激百丈空潭數魴鯉
逝將桂浦擷蘭蓀不記槐堂收劒履却思庾嶺今何在

更說彭城真夢耳

來詩述彭城舊游

君知先竭是甘井我願得

全如苦李安心不復九回腸至道終當三洗髓廣陵陽

羨何足較只有無何真我里

余買田陽羨來詩以為不如廣陵

樂全老

子今禪伯

張安道也定國其壻

掣電機鋒不容擬心通豈復問云

何印可聊須答如是相逢為我話留滯桃花春漲孤舟

起

贈梁道人

採藥壺公處處過
笑看金狄手摩挲
老人久識君
久造物小兒如子
何寒盡山中無
厯日雨斜江上一
漁蓑神仙護短多
官府未厭人間
醉踏歌

題雍秀才畫草蟲八物

促織

月叢號耿耿露葉
泣溥溥夜長不自
暖那憂公子寒

蟬

蛻形濁汙中羽翼便翾好秋來閒何闊已抱寒莖槁

蝦蟇

睥目知誰瞋鰭腹空自脹慎勿困蜈蚣饑蛇不汝放

蜣螂

洪鐘起暗室飄瓦落空庭誰言轉丸手能作殷牀聲

天水牛

兩角徒自長空飛不服箱為牛竟何事利吻穴枯桑

蝎虎

跂跂有足蛇脉脉無角龍為虎君勿笑食盡蠆尾蟲

蝸牛

腥涎不滿殼聊足以自濡升高不知回竟作粘壁枯

鬼蝶

雙眉卷鐵絲兩翅暈金碧初來花爭妍忽去鬼無迹

泗州南山監倉蕭淵東軒二首

偶隨樵父採都梁

南山名都梁山山出都梁香故也

竹屋松扉試乞漿

但見東軒堪隱几不知公子是監倉溪中亂石牆垣古

山下寒蔬七箸香我是江南舊游客
桂冠知有老蕭郎
北望飛塵苦晝霾洗心聊復寄東齋
珍禽聲好猶思越
野橘香清未過淮有信微泉來遠嶺
無心明月轉空階
一官倉庾真堪老坐看松根絡斷崖

泗州除夜雪中黃師是送酥酒二首

暮雪紛紛投碎米春流咽咽走黃沙
舊游似夢徒能說
逐客如僧豈有家冷硯欲書先自凍
孤燈何事獨成花
使君半夜分酥酒驚起妻孥一笑譁

闕右土酥黃似酒揚州雲液却如酥欲從元放覓拄杖
忽有麴生來座隅對雪不堪令飽煖隔船應已厭歌呼
明朝積玉深三尺高枕牀頭尚一壺

章錢二君見和復次韻荅之

黃昏已作風翻絮半夜猶驚月在沙照汴玉峰明佛剎
隔淮雲海暗人家來牟有信迎三白蘆蔔無香散六花
蘆蔔 梔子花也
與雪花皆六出欲喚阿咸來守歲林烏櫪馬鬪喧譁

分無纖手栽春勝况有新詩點蜀酥醉裏冰髭失纓絡

夢回布被起廉隅君應旅睫寒生暈我亦饑腸夜自呼
明日南山春色動不知誰佩紫微壺

正月一日雪中過淮謁客回作二首

十里清淮上長堤轉雪龍冰崖落屐齒風葉亂衰茸萬
頃穿銀海千尋渡玉峰從來脩月手合在廣寒宮

攢眉有底恨得句不妨清霽霧開寒谷饑鴉舞雪城橋
聲春市散塔影莫淮平不用殘燈火船窓夜自明

劉乙新作射堂

乙父嘗
知眉州

蘭玉當年刺史家，雙韃馳射笑穿花。而今白首閒驄馬，
只有清樽照畫蛇。寂寂小軒蛛網遍，陰陰垂柳鴈行斜。
手柔弓燥春風後，置酒看君中戟牙。

孫莘老寄墨四首

徂徠無老松，易水無良工。珍材取樂浪，妙手惟潘翁。

潘谷

作墨雜用
高麗煤

魚胞熟萬杵，犀角盤雙龍。墨成不敢用，進入

蓬萊宮。蓬萊春晝永，玉殿明房櫳。金箋洒飛白，瑞霧縈
長虹。遙憐醉常侍，一笑開天容。

谿石琢馬肝剡藤開玉版噓噓雲霧出奕奕龍蛇縮此
中有何好秀色紛滿眼故人歸天祿古漆窺蠹簡隕麋
給尚方老手擅編刻分餘幸見及流落一歎赦

我貧如饑鼠長夜空齧齧瓦池研竈煤葦管書柿葉近

者唐夫子遠致烏玉玦

唐林夫寄張遇墨半丸

先生又繼之圭璧

爛箱篋清窓洗硯坐蛇蚓稍蟠結便有好事人敲門求

醉帖

吾窮本坐詩久服朋友戒五年江湖上閉口洗殘債今

來復稍稍快癢如爬疥先生不譏訶又復寄詩械幽光
發竒思點黥出荒怪詩成一自笑故疾逢鰕蟹

留題蘭皋亭

雪後東風未肯和扣門遷客夜經過不知舊竹生新筍
但見清伊換濁河無復往來乘下澤聊同笑語說東坡
明年我亦開三徑寂寂無無雀可羅

和人見贈

只寫東坡不著名此身已是一長亭壯心無復春流起

衰鬢從交病葉零
知有雪兒供筆硯
應嗤竈婦洗盆餅
回來索酒公應厭
京口新傳作客經

和田仲宣見贈

頭白江南醉司馬
寬心時復喚殷兄
寒潮不應淮無信
客路相隨月有情
未許低頭拜東野
徒言共飲勝公榮
好詩惡韻那容和
刻燭應須便置觥

和王勝之三首

城上湖光暖欲波
美人唱我踏春歌
魯公賓客皆詩酒

誰是神仙張志和

齋釀如澠漲綠波公詩句句可絃歌流觴曲水無多日
更作新詩繼永和

要知太守憐孤客不惜陽春和俚歌坐睡樽前呼不應
為公雕琢損天和

記夢并序

樂全先生夢人以詩三篇示之字皆旁行而不可識旁
有人道衣古貌為讀其中一篇云人事且常在留質悟

圓間凡四句覺而忘其二以告其客蘇軾軾以私意廣之云

圓間有物物間空豈有圓空入井中不信天形真箇樣
故應眼力自先窮連環已解如神手萬竅猶號未濟風
稽首問公公大笑本來誰礙更求通

東坡全集卷十四

欽定四庫全書

集部

東坡全集卷十五

六

詳校官庶吉士臣謝恭銘

檢討臣何思鈞覆勘

總校官進士臣朱鈐

校對官編修臣戴聯奎

謄錄監生臣曹夢彪

欽定四庫全書

東坡全集卷十五

宋 蘇軾 撰

詩七十二首

寄蘄簞與蒲傳正

蘭溪美箭不成笛離離王筋排霜脊千溝萬縷自生風
入手未開先慘慄公家列屋間蛾眉珠簾不動花陰移
霧帳銀牀初破睡牙籤玉局坐彈碁東坡病叟長羈旅
凍卧饑吟似饑鼠倚賴春風洗破衾一夜雪寒披故絮

火冷燈青誰復知孤舟兒女自嗟咿皇天何時反炎燠
愧此八尺黃琉璃願公淨掃清香閣卧聽風漪聲滿榻
習習還從兩腋生請公乘此朝閭闔

寄怪石石斛與魯元翰

山骨裁方斛江珍拾淺灘清池上几案碎月落杯盤老
去懷三友平生困一簞堅姿聊自傲秀色亦堪餐好去
髯卿舍憑將道眼看東坡最後供霜雪照人寒

漁父四首

漁父飲誰家去魚蟹一時分付酒無多少醉為期彼此
不論錢數

漁父醉蓑衣舞醉裏却尋歸路輕舟短棹任斜橫醒後
不知何去

漁父醒春江午夢斷落花飛絮酒醒還醉醉還醒一笑
人間今古

漁父笑輕鷗舉漠漠一江風雨江邊騎馬是官人借我
孤舟南渡

李憲仲哀詞

并叙

同年友李君諱惇字憲仲賢而有文不幸早世軾不及
與之游也而識其子廌有年矣廌自陽翟見余於南京
泣曰吾祖母邊母馬前母張與君之喪皆未葬貧不敢
以饑寒為戚顧四喪未舉死不瞑目矣適會故人梁先
吉老聞余當歸耕陽羨以絹十匹絲百兩為贍辭之不
可乃以遺廌曰此亦仁人之餽也既又作詩以告知君
與廌者庶幾皆有以助之廌年二十五其文蔚然氣節

不凡此豈終窮者哉

大夢行當覺百年特未滿遑哀已逝人長眠寄孤館念
我同年生意長日月短鹽車困騏驎烈火廢圭瓚後生
有奇骨出語已精悍蕭然野鶴姿誰復識中散有生寓
大塊死者誰不窳嗟君獨久客不識黃土暖推衣助孝
子一溉滋湯旱誰能脫左驂大事不可緩

贈眼醫王生彥若

鍼頭如麥芒氣出如車軸間闕絡脉中性命寄毛粟而

況清淨眼內景含天燭琉璃貯沆瀣輕脆不任觸而子
於其間來徃施鋒鏃笑談紛自若觀者頸為縮運鍼如
運斤去翳如拆屋常疑子善幻他技雜符祝子言吾有
道此理君未矚形骸一塵垢貴賤兩草木世人方重外
妄見瓦與玉而我初不知刺眼如刺肉君看目與翳是
翳要非目目翳苟二物易分如麥菽寧聞老農夫去草
更傷穀鼻端有餘地肝膽分楚蜀吾於五輪間蕩蕩見
空曲如行九軌道並驅無擊轂空花誰開落明月自拙

胸請問樂全堂忘年老尊宿

彦若樂全先生門下賢也

與歐育等六人飲酒

忽驚春色二分空且看樽前半丈紅
苦戰知君便白羽倦遊憐我憶黃封
年來齒髮老未老此去江淮東復東
記取六人相會處引杯看劍坐生風

觀杭州鈐轄歐育刀劍戰袍

青綾納衫暖襯甲紅線勒巾光遶脅
禿襟小袖鵬鵠盤大刀長劍龍蛇插
兩軍鼓噪屋瓦墜紅塵白羽紛相戛

將軍恩重此身輕
笑履鋒銳如一搗書生
只肯坐帷幄談笑毫端
弄生殺叫呼擊鼓催上竿
猛士應憐小兒黠
試問黃河夜偷渡掠面驚
沙寒霎霎何如大艦日高眠
一枕清風過苔雪

王伯敬所藏趙昌畫四首

梅花

南行渡關山沙水清練練
行人已愁絕日暮集微霰
殷勤小梅花髣髴吳姬面
暗香隨我去回首驚千片至今

開畫圖老眼淒欲泣幽懷不可寫歸夢君家倩

黃葵

弱質困夏求奇姿蘇曉涼低昂黃金杯照耀初日光檀
心自成暈翠葉森有芒古來寫生人妙絕誰似昌晨粧
與午醉真態含陰陽君看此花枝中有風露香

芙蓉

清颺已拂林積水漸收潦谿邊野芙蓉花水相媚好坐
看池蓮盡獨伴霜菊槁幽姿強一笑暮景迫摧倒淒涼

似貧女嫁晚驚衰早誰寫少年容樵人劍南老

山茶

蕭蕭南山松黃葉墮勁風誰憐兒女花散火冰雪中能
傳歲寒姿古來惟丘翁趙叟得其妙一洗膠粉空掌中
調丹砂染此鶴頂紅何須誇落墨獨賞江南工

寄吳德仁兼簡陳季常

東坡先生無一錢十年家火燒凡鉛黃金可成河可塞
只有霜鬢無由玄龍丘居士亦可憐談空說有夜不眠

忽聞河東獅子吼拄杖落手心茫然誰似濮陽公子賢
飲酒食肉自得仙平生寓物不留物在家學得忘家禪
門前罷亞十頃田清溪遶屋花連天溪堂醉卧呼不醒
落花如雪春風顛我遊蘭溪訪清泉已辦布襪青行纏
稽山不是無賀老我自興盡回酒船恨君不識顏平原
恨我不識元魯山銅駝陌上會相見握手一笑三千年

題王逸少帖

顛張醉素兩禿翁追逐世好稱書工何曾夢見王與鍾

妄自粉飾欺盲聾有如市倡抹青紅妖歌嫚舞眩兒童
謝家夫人淡丰容蕭然自有林下風天門蕩蕩驚跳龍
出林飛鳥一掃空為君草書續其終待我他日不忽忽

書林逋詩後

吳儂生長湖山曲呼吸湖光飲山渌不論世外隱君子
傭兒販婦皆冰玉先生可是絕俗人神清骨冷無由俗
我不識君曾夢見瞳子瞭然光可燭遺篇妙字處處有
步繞西湖看不足詩如東野不言寒書似西臺差少肉

平生高節已難繼將死微言猶可錄自言不作封禪書

更肯悲吟白頭曲

通臨終詩云茂陵異日求遺草猶喜初無封禪書

我笑吳人

不好事好作祠堂傍修竹不然配食水仙王一盞寒泉薦秋菊

和仲伯達

歸山歲月苦無多尚有丹砂奈老何繡谷只應花自染
鏡潭長與月相磨君方傍海看初日我已橫江擊素波
人不我知斯我貴不須雷雨起龍梭

春日

鳴鳩乳燕寂無聲日射西窓潑眼明
午醉醒來無一事
只將春睡賞春晴

贈袁陟

是身如虛空萬物皆我儲胡為強分別
百金買田廬不
見袁夫子神馬載尻輿游於無何有一飯不願餘官湖
為我池學舍為我居何以遺子孫此身自蘧蔭薰風暗
楊柳秋水淨芙蓉應觀我知子不怪子知魚

蘇子容母陳夫人挽詞

蘇陳甥舅真冰玉正始風流起頽俗夫人高節稱其家凜
凜寒松映修竹雞鳴為善日日新八十三年如一晨豈
惟家室宜壽母實與朝廷生異人忘軀殉國乃吾子三
仕何曾知愠喜不煩擁笏強垂魚我視去來皆夢耳誦
詩相挽真區區墓碑千字多遺餘他年太史取家傳知
有班昭續漢書

歸宜興留題竹西寺

十年歸夢寄西風此去真為田舍翁
刺覓蜀岡新井水要携鄉味過江東

道人勸飲雞蘇水童子能煎鴛粟湯
慙借藤牀與瓦枕莫教孤負竹風涼

此生已覺都無事今歲仍逢大有年
山寺歸來聞好語野花啼鳥亦欣然

與孟震同遊常州僧舍

年來轉覺此生浮又作三吳浪漫遊
忽見東平孟君子

夢中相對說黃州

湛湛清池五月寒
小山無數碧巔巘
穉杉戢戢三千本
且作凌雲合抱看

知君此去便歸耕
笑指孤舟一葉輕
待向三節乞靈雨
半篙流水送君行

贈常州報恩長老

碧玉碗盛紅碼碯
井花水養石菖蒲
也知法供無窮盡
試問禪師得飽無

薦福老懷真巧便淨慈兩本更尖新憑師為作鐵門限
準備人間請話人

次韻荅賈耘老

五年一夢南司州饑寒疾病為子憂東來六月井無水
仰看古堰橫奔牛平生管鮑我知子今日陳蔡誰從丘
夜航爭渡泥水澁牽挽直欲來瓜州自言嗜酒得風痺
故鄉不敢居溫柔空將汎愛救溝壑衰病不復從前樂
今年太守真卧龍笑語炎天出水電時低九尺蒼鬚髯

我過三間小池閣故人改觀爭來賀小兒不信猶疑錯
為君置酒飲且哦草間秋蟲亦能歌可憐老驥真老矣
無心更秣天山禾

墨花

并叙

世多以墨畫山水竹石人物者未有以畫花者也汴人
尹白能之為賦一首

造物本無物忽然非所難花心起墨暈春色散毫端縹
緲形纔具扶踈態自完蓮風盡傾倒杏雨半披殘獨有

狂居士求為黑牡丹兼書平子賦歸向雪堂看

送竹几與謝秀才

平生長物擾天真老去歸田只此身留我同行木上坐
贈君無語竹夫人但隨秋扇年年在莫關瓊枝夜夜新
堪笑荒唐玉川子暮年家口若為親

溪陰堂

白水滿時雙鷺下綠槐高處一蟬吟酒醒門外三竿日
卧看溪南十畝陰

次韻許遵

蒜山渡口挽歸艍，朱雀橋邊看道裝。
供帳已應煩百兩，擊鮮無久溷諸郎。
禪時到長干寺，載酒閒過綠野堂。
此味只憂兒輩覺，逢人休道北牕涼。

贈章默

并叙

章默居士字志明，生公侯家，才性高爽，棄家求道，不蓄妻子，與世無累。而父母與兄之喪，貧不能舉，以是眷眷世間，不能無求於人。余深哀其志，既有以少助之，又取

其言為詩以贈其行庶幾有哀之者

章子親未葬餘生抱羸疾朝吟噎隣里夜淚腐茵席前
年黑花生今歲白髮出身隨日月逝恨與天地畢願求
不毛田親築長夜室難從王孫裸未忍夏后聖五陵多
豪士百萬付一擲心知義財難甘就貧友乞不辭毛粟
施行自丘山積此志苟朝遂夕死真不戚誓求無生理
不踐有為迹棄身尸陀林烏鳥任狼籍

送穆越州

江海相忘十五年，羨君松柏蔚蒼顏。
四朝耆舊永霜後，兩郡風流水石間。
舊政猶傳蜀父老，先聲已振越溪山。
樽前俱是蓬萊守，莫放高樓雪月閒。

贈葛葦

竹椽茆屋半摧傾，肯向蜂窠寄此生。
長恐波頭卷室去，欲將船尾載君行。
小詩試擬孟東野，大草閒臨張伯英。
消遣百年須底物，故應憐我不歸耕。

贈王寂

與君覽別不須嗟俯仰歸來鬢未華
記取江南煙雨裏
青山斷處是君家

南都妙峰亭

千尋挂雲闕十頃含風灣
開門弄清泚照見雙銅鑲
池臺半禾黍桃李餘榛菅
無人肯回首日暮車班班
史君非世人心與古佛閒
時邀聲利客來洗塵埃
顏新亭在東阜飛宇臨
通闌古甃磨翠壁霜林散
煙鬟孤雲抱商丘芳草連
杏山俯仰盡法界逍遙寄
入寰亭亭妙高峯

了了蓬艾間五老壓彭蠡三峰照潼關均為拳石小配
此一掬慳煩公為標指免使慙躋攀

神宗皇帝挽詞三首

文武固天縱欽明又日新化民何止聖妙物獨稱神政
已三王上言皆六籍醇巍巍本無象刻畫愧孤臣

未易名堯德何須數舜功小心仍致孝餘事及平戎典
禮從周舊官儀與漢隆誰知本無作千古自承風

接統真千歲膺期止一章周南稍留滯宣室遂淒涼病

馬空嘶櫪枯葵已泣霜餘生卧江海歸夢泣嵩邛

金山妙高臺

我欲乘飛車東訪赤松子蓬萊不可到弱水三萬里不
如金山去清風半帆耳中有妙高臺雲峰自孤起仰觀
初無路誰信平如砥臺中老比丘碧眼照窓几巉巉玉
為骨凜凜霜入齒機鋒不可觸千偈如翻水何須尋德
雲即此比丘是長生未暇學請學長不死

贈杜介

并叙

元豐八年七月二十五日杜幾先自浙東還與余相遇
於金山話天台之異以詩贈之

我夢遊天台橫空石橋小松風吹菌露翠濕香嫋嫋應
真飛錫過絕澗度雲鳥舉意欲從之翛然已松杪微言
粲珠玉未說意先了覺來如墮空耿耿窓戶曉羣生陷
迷網獨達從古少杜叟子何人長歎萬物表妻孥空四
壁振策念輕矯遂為赤城游飛步凌縹緲問禪不歸舍
屢為瓠壺統何人識此志佛眼自照瞭我夢君見之卓

爾非魔嬈仙葩發茗碗翦刻分葵蓼從今更不出閉戶
閒騷裏時從佛頂巖馳下雙蓮沼

次韻孫莘老斗野亭寄子由在邵伯堰

落帆謝公渚日脚東西平孤亭得小憩暮景含餘清坐
待斗與牛錯落挂南甕老僧如夙昔一笑意已傾新詩
出故人舊事疑前生吾生七徃來送老海上城逢人輒
自哂得魚不忍烹似聞續溪老復作東都行小詩如秋
菊艷艷霜中明過此感我言長篇發春榮

送楊傑

并叙

無為子嘗奉使登太山絕頂雞一鳴見日出又嘗以事
過華山重九日飲酒蓮花峯上令乃奉詔與高麗僧統
遊錢塘皆以玉事而從方外之樂善哉未曾有也作是
詩以送之

天門夜上賓出日萬里紅波半天赤歸來平地看跳丸
一點黃金鑄秋橘太華峰頭作重九天風吹灑黃花酒
浩歌馳下腰帶鞶醉舞崩崖一揮手神遊八極萬緣虛

下視蛟雷隱汙渠大千一息八十返笑厲東海騎鯨魚
三韓王子西求法鑿齒彌天兩勅敵過江風急浪如山
寄與舟人好看客

次韻送徐大正

嘗與余約卜鄰江淮間將赴登
州同舟至山陽以詩見送留別

別時酒盞照燈花知我歸期漸有涯去歲渡江萍似斗
今年並海棗如瓜多情明月邀君共無價青山為我賒
千首新詩一竿竹不應空釣漢江槎

楊康功有石狀如醉道士為賦此詩

楚山固多猿青者黠而壽化為狂道士山谷恣騰蹂誤
入華陽洞竊飲茆君酒君命囚巖間巖石為械扭松根
絡其足藤蔓縛其肘蒼苔眯其目叢棘哽其口三年化
為石堅瘦敵瓊玖無復號雲聲空餘舞杯手樵夫見之
笑抱賣易升斗楊公海中仙世俗那得友海邊逢姑射
一笑微俛首胡不載之歸用此頑且醜求詩紀其異本
未得細剖吾言豈妄云得之亡是叟

迨作淮口遇風詩戲用其韻

我詩如病驥悲鳴向衰草有兒真驥子一噴羣馬倒養
氣勿吟哦聲名忌太早風濤借筆力勢逐孤雲掃何如
陶家兒逃舍覓梨棗君看押強韻已勝郊與島

次韻徐積

殺雞未肯邀季路裹飯先須問子來但見中年隱槐市
豈知平日賦蘭臺海山入夢方東去風雨留人得暫陪
若說峨眉眼前是故鄉何處不堪回

元豐七年有詔京東淮南築高麗亭館密海

二州騷然有逃亡者明年軾過之歎其壯麗
留一絕云

簷楹飛舞垣牆外桑柘蕭條斤斧餘盡賜昆耶作奴婢
不知償得此人無

過密州次韻趙明叔喬禹功

先生依舊廣文貧老守時遭醉尉嗔汝輩何曾堪一笑
吾儕相對復三人黃雞催曉淒涼曲白髮驚秋見在身
一別膠西舊朋友扁舟歸釣五湖春

再過常山和昔年留別詩

偃樓山前叟迎我如迎新
那知夢幻軀念念非昔人
江湖久放浪朝市誰相親
却尋泉源去桃花逢避秦

再過超然臺贈太守霍翔

昔飲雩泉別常山天寒歲在龍
虵間山中兒童拍手笑
問我西去何當還十年不赴竹馬約
扁舟獨與漁蓑閒
重來父老喜我在扶挈老幼相遮攀
當時襁褓皆七尺
而我安得留朱顏問今太守為誰歟
護羌充國鬢未斑

翔自言在熙河
作屯田有功

躬持牛酒勞行役無復杞菊嘲寒慙超
然置酒尋舊迹尚有詩賦鑱堅頑孤雲落日在馬耳照
耀金碧開煙鬟卻淇自古北流水跳波下瀨鳴玦環願
公談笑作石埭坐使城郭生溪灣

海市

并叙

予聞登州海市舊矣父老云常出於春夏今歲晚不復
見矣予到官五日而去以不見為恨禱於海神廣德王
之廟明日見焉乃作此詩

東方雲海空復空羣仙出沒空明中蕩搖浮世生萬象
豈有貝闕藏珠宮心知所見皆幻影敢以耳目煩神工
歲寒水冷天地閉為我起蟄鞭魚龍重樓翠阜出霜曉
異事驚倒百歲翁人間所得容力取世外無物誰為雄
率然有請不我拒信我人厄非天窮潮陽太守南遷歸
喜見石廩堆祝融自言正直動山鬼豈知造物哀龍鍾
信眉一笑豈易得神之報汝亦已豐斜陽萬里孤鳥沒
但見碧海磨青銅新詩綺語亦安用相與變滅隨東風

登州孫氏松堂

萬松誰種已樅樅半嶺蒼雲映此邦
露重珠纓蒙翠蓋
風來石齒碎寒江
浮空兩竹橫南閣
倒景扶桑射北窓
坐待夕烽傳海嶠
重城歸去踏逢逢

過萊州雪後望三山

東海如碧環西北
卷登萊雲光與天色
直到三山回我行
適冬仲薄雪收浮埃
黃昏風絮定半夜
扶桑開參差
太華頂出沒雲濤堆
安期與羨門乘龍安在哉
茂陵秋

風客勸爾麾一杯帝鄉不可期楚些招歸來

遺直坊

并叙

富鄭公之客李君諱常登人也故太守李公諱師中榜其閭曰遺直而其子大方求詩於軾為賦一首

使君不浪出羔鴈親扣門先生但清坐薤水已多言當時邦人化市無晨飲豚歲月曾幾何客主皆九原魯經有餘歎楚些無歸魂我作遺直詩過者式其藩

次韻趙令鑠

東坡已報六年穰惆悵紅塵白首郎枕上溪山猶可見
門前冠蓋已相望故人年少真瓊樹落筆風生戰堵牆
端向甕間尋吏部老來專以醉為鄉

次韻王定國得穎倅二首

仙風入骨已凌雲秋水為文不受塵一噫固應號地籟
餘波猶足掛天紳買牛但自捐三尺射鼠何勞挽六鈞
莫向百花潭上去醉翁不見與誰春

滔滔四海我知津每愧先生植杖芸自少多言晚聞道

從今閉口不論文
灑翻白獸樽中酒
歸煮青泥坊底芹
要識老僧無盡處
牀前牛蟻不曾聞

次韻趙令鑠惠酒

神仙無石髓
生世悲慙寓
坐待玉膏流
千載真旦暮
青州老從事
鬲上非所部
惠然肯見從
知我憎市酤
開餅自洗盞
肴核誰與具
門前聽剥啄
烹魚得尺素

送范純粹守慶州

才大古難用
論高常近迂
君看趙魏老
乃為滕大夫
浮

雲無根蒂黃潦能須更知經幾成敗得見真賢愚羽旄
照城闕談笑安邊隅當年老使君赤手降於菟諸郎更
何事折箠鞭其雛吾知鄧平叔不鬪月支胡

次韻王震

携文過我治平間霧豹當時始一斑聞道吹噓借餘論
故教流落得生還清篇帶月來霜夜妙語先春發病顏詩
酒暮年猶足用竹林高會許時攀

次韻王定國謝韓子華過飲

楚有孫叔敖長城隱千里哀哉練裙子負薪躡破履豈
無故交親逝去如覆水不如老優孟談笑託諧美世家
不可恃如倚折足几祥符有賢相手握天下砥礪敏亦
名公三貴德爵齒蓋棺今幾日公子誰料理誰要卿料
理欲說且止止宅相開府公久為蒼生起如何垂老別
水盤餽蒼耳親嫌妨鶚薦相對發微泚新詩如彈丸脫
手不移晷我亦老賓客苦語落紈綺莫辭三上章有道
貧賤耻

惠崇春江曉景二首

竹外桃花三兩枝，春江暖鴨先知。
蒹葭滿地蘆芽短，正是河豚欲上時。

兩兩歸鴻欲破羣，依依還似北歸人。
遙知朔漠多風雪，更待江南半月春。

次韻周邵

南遷欲舉力田科，三徑初成樂事多。
豈意殘年踏朝市，有如疲馬畏陵坡。
羨君同甲心方壯，笑我無耶鬢已皤。

何日西湖尋舊賞
淡煙疎雨暗漁蓑

次韻胡完夫

青山別淚尚爛斑
十載江湖困抱關
老去上書還北闕
朝來拄笏望西山
相從盃酒形骸外
笑說平生醉夢間
萬事會須咨伯始
白頭容我占清閒

次韻錢穆父

老入明光踏舊班
染鬚那復唱陽關
故人飛上金鑾殿
遷客來從飯顆山
大筆推君西漢手
一言置我二劉間

便須置酒呼同舍看賜飛龍出帝閑

再次韻答完夫穆父

二公自言先世同在西掖

掖垣老吏識郎君並轡天街兩絕塵
汗血固應生有種夜光那復困無因
豈知西省深嚴地也著東坡病瘦身
免使謫仙明月下狂歌對影只三人

次韻答滿思復

自甘茅屋老三間豈意彤庭綴兩班
紙落雲烟供醉後詩成珠玉看朝還
誰言載酒山無賀記取啼烏巷有顏

但恐跛牂隨赤驥青雲飛步不容攀

東坡全集卷十五

欽定四庫全書

東坡全集卷十六

宋 蘇軾 撰

詩八十八首

送戴蒙赴成都玉局觀將老焉

拾遺被酒行歌處
野梅官柳西郊路
聞道華陽版籍中
至今尚有城南杜
我欲歸尋萬里橋
水花風葉暮蕭蕭
芋魁徑尺誰能盡
檀木三年已足燒
百歲風狂定何有
羨君今作我眉叟
縱未家生執戟郎
也應世出埋輪守

莫欺老病未歸身玉局他年第幾人會待子猷清興發
還須雪夜去尋君

送陳睦知潭州

華清縹渺浮高棟上有顓林藏石甕一杯此地初識君
千巖夜上同飛鞚君時年少面如玉一飲百觚嫌未痛
白鹿泉頭山月出寒光潑眼如流汞朝元閣上酒醒時
卧聽風鸞鳴鐵鳳舊遊空在人何處二十三年真一夢
我得生還雪髯滿君亦老嫌金帶重有如社燕與秋鴻

相逢未穩還相送
洞庭青草渺無際
天柱紫蓋森欲動
湖南萬古一長嗟
付與騷人發嘲弄

用前韻荅西掖諸公見和

雙猊蟠礎龍纏棟
金井轆轤鳴曉甕
小殿垂簾白玉鉤
大宛立仗青絲鞚
風馭賓天雲雨隔
孤臣忍淚肝腸痛
羨君意氣風生坐
落筆縱橫盤走汞
上樽日日寫黃封
賜茗時時開小鳳
閉門憐我老太玄
給札看君賦雲夢
金奏不知江海眩
木衣屢費瓊瑤重
豈惟蹇步困追攀
已

覺侍史疲犇送春還官柳腰肢活雨入御溝鱗甲動借
君妙語發春容顧我風琴不成弄

次韻王覲正言喜雪

聖人與天通有詔寬獄市好語夜喧街濕雲朝覆砌紛
然退朝後色映宮槐媚欲誇翦刻工故上朱監袂我方
執筆待未敢書上瑞君猶伏閣爭高論亦少慰霏霏止
還作盎盎風與氣神龍久潛伏一怒勢必倍行當見三
白拜舞謹萬歲歸來飲君家酣詠追既醉

和蔣發運

夜語翻千偈書來又一言此身真佛祖何處不羲軒船
穩江吹坐樓空月入樽遙知思我處醉墨在頽垣

送表弟程六知楚州

炯炯明珠照雙壁當年三老蘇程石里人下道避鳩杖
刺史迎門倒鳬舄我時與子皆兒童狂走從人覓梨栗
健如黃犢不可恃隙過白駒那暇惜醴泉寺古垂橘柚
石頭山高閣松櫟諸孫相逢萬里外一笑未解千憂積

子方得郡古山陽老手風生謝刀筆我正含毫紫微閣
病眼昏花困書檄莫教印綬繫餘年去掃墳墓當有日
功成頭白早歸來共藉梨花作寒食

和人假山

上黨攬天碧玉環絕河千里抱商顏試觀煙雨三峰外
都在靈仙一掌間造物何如童子戲寫真聊發使君閒
何當挈取征西去畫作圍床六曲山

送王伯敬守號

華山東麓秦遺民當時依山來避秦至今風俗含古意
柔桑綠水招行人行人掉臂不回首爭入峭崿土囊口
惟有使君千里來欲飲三堂無事酒三堂本來一事無
日長睡起聞投壺牀頭硯石開雲月澗底松根斲雪腴
山棚盜散人安寢勸買耕牛發陳廩歸來只作水衡卿
我欲携壺就君飲

道者院池上作

下馬逢佳客攜壺傍小池清風亂荷葉細雨出魚兒并

好能水齒茶甘不上眉歸塗更蕭瑟真箇解催詩

次韻子由送千之姪

江上松楠深復深滿山風雨作龍吟年來老幹都生菌
下有孫枝欲出林白髮未成歸隱計青衫儻有濟時心
閉門試草三千牘仄席求人少似今

書文與可墨竹

并叙

亡友文與可有四絕詩一楚詞二草書三畫四與可嘗
云世無知我者惟子瞻一見識吾妙處既沒七年覩其

遺迹而作是詩

筆與子皆逝詩令誰為新空遺運斤質却弔斷絃人

次韻錢舍人病起

牀下龜寒且耐支杯中蛇去未應衰殿門明日逢王傅
櫺具爭先看不疑坐覺香煙攜袖少獨愁花影上廊遲
何妨一笑千病散絕勝倉公飲上池

次韻和王鞏

謫仙竄夜郎子美耕東屯造物豈不惜要令工語言王

郎年少日文如餅水翻爭鋒雖剽甚聞鼓或驚犇天欲
成就之使觸羝羊藩孤光照微陋耿如月在盆歸來千
首詩傾瀉五石樽却疑彭澤在頗覺蘇州煩君看騶忌
子廉折配春溫知音必無人壞壁掛桐孫

用王鞏韻送其姪震知蔡州

九門挿天開萬馬先朝屯舉鞭紅塵中相見不得言夜
走清虛宿扣門驚鵲翻君家汾陽家永巷車雷轟夕郎
方不夕列戟以自藩相逢開月閣畫簷低金盆至令夢

中語猶舉燈前樽阿戎脩玉牒未憚筆削煩君歸助獻
納坐繼岑與溫我客二子間不復尋諸孫

子美詩云權門多噂沓且

復尋
諸孫

虢國夫人夜遊圖

佳人自鞚玉花驄翩如驚燕踏飛龍金鞭爭道寶釵落
何人先入明光宮宮中羯鼓催花柳玉奴絃索花奴手
坐中八姨真貴人走馬來看不動塵明眸皓齒誰復見
只有丹青餘淚痕人間俯仰成今古吳公臺下雷塘路

當時亦笑張麗華不知門外韓擒虎

用舊韻送魯元翰知洛州

我在東坡下躬耕三畝園君為尚書郎坐擁百吏繁鳴蛙與鼓吹等是俗物喧求謝十年舊老死三家村惟君綈袍信到我雀羅門緬懷故人意欲使薄夫敦新年對宣室白首代堯言相逢問前輩所見多後昆道館雖云樂冷卿當復溫還持刺史節却駕朱輪軒黃髮方用事白鬚宜少存嗣聖真生知救民如救燔初囚羽淵魄盡

返湘江魂坐憂東郡決老守思王尊北流桑柘沒故道
塵埃翻知君一寸心可敵千步垣流亡自栖止老幼忘
崩犇得閒閉閣坐勿使道眼渾聊乘應捨筏直泝無生源
歸來成二老夜榻當重論

次韻朱光庭初夏

朝罷人人識鄭崇直聲如在履聲中卧聞疎響梧桐雨
獨詠微涼殿閣風諫苑君方續承業醉鄉我欲訪無功
陶然一枕誰呼覺牛蟻新除病後聰

次韻朱光庭喜雨

久苦趙盾日欣逢傳說霖坐知千里足初覺兩河深破
屋常持傘無薪欲爨琴清詩似庭燎雖美未忘箴

奉敕祭西太一和韓川韻四首

聖主新除祕祝侍臣來乞豐年壽宮神君欲至半夜
靈風肅然

玉璽親題御筆金章來侍天香禮罷祝融參乘前驅
已過衡湘

解劍獨行殘月披衣困卧清風夢蝶猶飛旅枕粥魚已
響枯桐

陂水初含曉淥稻花半作秋香皂蓋却迎朝日紅雲正
遶宮牆

西太一見王荊公舊詩偶次其韻二首

秋早川原淨麗雨餘風日清酣從此歸耕劍外何人送
我池南

但有樽中若下何須墓上征西聞道烏衣巷口而今煙

草萋迷

次韻子由送陳侗知陝州

誰能如鐵牛橫身負黃河滔天不能沒尺箠未易訶世
俗自無常徐公故遠迤邐別來不可說事與浮雲多當時
無限人毀譽即墨阿虛聲了無實夜蟲鳴機梭相逢一
笑外奈此白髮何天驥皆籊雲長鳴飽芻禾王庭旅百
寶大貝隨弓戈君獨一麾去欲賡五袴歌甘棠古樂國
白酒金叵羅知君不久留治行中新科過客足嗔喜東

堂記分鵝此外但坐歎後生工揣摩

送賈訥倅眉二首

當年入蜀歎空回未見峨眉肯再來童子遙知頌襦袴
使君先已洗樽壘

李大夫眉之賢守也

鹿頭北望應逢鴈人日東

郊尚有梅

人日出東郊渡江游幕顧山眉之故事也

我老不堪歌樂職後生

試覓子淵才

老翁山下玉淵回手植青松三萬栽父老得書知我在
小軒臨水為君開試看一一龍蛇活更聽蕭蕭風雨哀

便與甘棠同不翦蒼髯白甲待歸來

先君葬於墓廂山之東二十餘里地

名老翁泉君許為一往感歎之深故及

送程建用

先生本舌耕文字浩千頃空倉付公子坐待發茗穎十年困新說兒女爭捕影鑿垣種蒿蓬嘉穀誰復省空餘南陔意太息北堂冷織屨隨方進採薪教韋逞辛勤守一經菽水賢五鼎今年聞起廢魯史復光景公子亦改官三就繁馬頸歸來一笑粲素髮颯垂領會看金花詔

湯沐奉朝請天公不吾欺壽與龜鶴求

次韻李脩孺留別二首

十年流落敢言歸魚鳥江湖只自知豈意青天掃雲霧
盡呼黃髮寄安危風流吾子真前輩人物他年記一時
我欲折繻留此老緇衣誰作好賢詩

此生別袖幾回麾夢裏黃州空自疑何處青山不堪老
當年明月巧相隨窮通等是思家意衰病難堪送客悲
好去江魚煮江水劒南歸路有姜詩

次韻黃魯直赤目

誦詩得非子夏學紬史正作丘明書天公戲人亦薄相
略遣幻翳生明珠賴君年來屏鮮腴百千燈光同一如
書成自寫蠅頭表端就君王覓鏡湖

和周正孺墜馬傷手

平生學道已神完豈復兒童私自憐醉墜何曾傷內守
色憂當為念先傳書空漸覺新詩健把蟹行看樂事全
賣却老驄為酒直大呼鄉友作新年

戲周正孺二絕

折臂三公未可知，會當千鎰訪權奇。
勸君鬻駱猶閒事，腸斷閨中楊柳枝。

天廐新頒玉鼻驂，故人共散亦常情。
相如雖老猶能賦，換馬還應繼二生。

題文與可墨竹

并叙

故人文與可為道師王執中作墨竹，且謂執中勿使他人書字待蘇子瞻來，令作詩其側。與可既沒八年而軾

始還朝見之乃賦一首

斯人定何人游戲得自在詩鳴草聖餘兼入竹三昧時
時出木石荒恠軼象外舉世知珍之賞會獨余最知音
古難合奄忽不少待誰云死生隔相見如龔隗

潘推官母李氏挽詞

南浦淒涼老逐臣東坡還往盡幽人杯盤慣作陶家客
絃誦常叨孟母隣尚有升堂他日約豈知負土一阡新
今年我欲江湖去暮雨連山宰樹春

玉堂栽花周正孺有詩次韻

故山桃李半荒榛
粗報君恩便乞身
竹簟暑風招我老
玉堂花蕊為誰春
纖纖翠蔓詩催發
皎皎霜葩鬢鬪新
只有來禽青李帖
他年留與學書人

杜介送魚

新年已賜黃封酒
舊老仍分鱸尾魚
陋巷關門負朝日
小園除雪得春蔬
病妻起斫銀絲膾
稚子謹尋尺素書
醉眼矍矍覓歸路
松江煙雨晚疎疎

送杜介歸揚州

再入都門萬事空閒看清洛
漾東風當年幃幄幾人在
回首觚稜一夢中採藥會須逢
薊子問禪何處識龐翁
歸來鄰里應迎笑新長淮南舊桂叢

秋詠石屏

霏霏點輕素耿耿開重陰
風花亂紫翠雪外有煙林
雪近勢方壯林遠意殊深
會有無事人支頤識此心

和黃魯直燒香二首

四句燒香偈子隨香遍滿東南不是聞思所及且令鼻
觀先參

萬卷明牕小字眼花只有爛斑一炷煙消火冷半生身
老心閒

再和二首

來詩言飲酒
畫竹石草書

置酒未逢休沐便同越北燕南且復歌呼相和隔牆知
是曹參

丹青已自前世竹石時窺一斑五字當還靖節數行誰

似高閒

武昌西山

并叙

嘉祐中翰林學士承旨鄧公聖求為武昌令常遊寒溪
西山山中人至今能言之軾謫居黃岡與武昌相望亦
常往來溪山間元祐元年十一月二十九日考試館職
與聖求會宿玉堂偶話舊事聖求嘗作元次山窪樽銘
刻之巖石因為此詩請聖求同賦當以遺邑人使刻之
銘側

春江淥漲蒲萄醅武昌官柳知誰栽憶從樊口載春酒
步上西山尋野梅西山一上十五里風駕兩腋飛崔嵬
同遊困卧九曲嶺褰衣獨到吳王臺中原北望在何許
但見落日低黃埃歸來解劍亭前路蒼崖半入雲濤堆
浪翁醉處今尚在石臼杯飲無樽罍爾來古意誰復嗣
公有妙語留山隈至今好事除草棘常恐野火燒蒼苔
當時相望不可見玉堂正對金鑾開豈知白首同夜直
卧看椽燭高花摧江邊曉夢忽驚斷銅環玉鎖鳴春雷

山人帳空猿鶴怨江湖水生鴻鴈來請公作詩寄父老
往和萬壑松風哀

再用前韻

朱顏發過如春醕胸中梨棗初未栽丹砂未易掃白髮
赤松却欲參黃梅寒溪本自遠公社白蓮翠竹依崔嵬
當時石泉照金像神光夜發如五臺飲泉鑒面得真意
坐視萬物皆浮埃欲收暮景返甲里遠沂江水窮離堆
還朝豈獨羞老病自歎才盡傾空壘諸公渠渠若夏屋

吞吐風月清隅隈我如廢井久不食古甕缺落生陰苔
數詩往復相感發汲新除舊寒光開遙知二月春江闊
雪浪倒捲雲峰摧石中無聲水亦靜云何解轉空山雷
欲就諸公評此語要識憂喜何從來願求南宗一勺水
往與屈賈湔餘哀

韋應物詩云水性本云靜石中固無聲如何兩相激雷轉空山驚

送楊孟容

我家我眉陰與子同一邦相望六十里共飲玻璃江
山不違人遍滿千家窓但苦窓中人寸心不自降子歸

治小國洪鐘噓微撞我留侍玉坐弱步欹豐扛後生多
高才名與黃童雙不肯入州府故人餘老龐慙慙與問
訊愛惜霜眉庾何以待我歸寒醅發春缸

見子由與孔常父唱和詩輒次其韻余昔在館
中同舍出入輒相聚飲酒賦詩近歲不復講
故終篇及之庶幾諸公稍復其舊亦太平盛
事也

君先魯東家門戶照千古文章固應爾須鬣餘似處雖

非蒙俱狀尚有歷國苦誦書口瀾翻布穀雜杜宇十年
困犇走櫛沐飽風雨吾道其非耶野處豈兕虎灞陵閒
老將柏直口尚乳自君兄弟還鼎立知有補蓬山耆舊
散故事誰剛去來迎馮翊傳出餞會稽組吾猶及前輩
詩酒盛冊府願君唱此風揚解斯杜舉

趙令晏崔白大圖幅徑三丈

扶桑大壘如甕盎天女織綃雲漢上往來不遣鳳銜梭
誰能鼓臂投三丈人間刀尺不敢裁丹青付與濠梁崔

風蒲半折寒鴈起竹間的
鰈橫江梅畫堂粉壁翻雲幕
十里江天無處著好卧元龍
百尺樓笑看江水拍天流

次韻張昌言給事省宿

馮顛久已歌殘雪戎眼何曾眩落暉
朔野按行猶雀躍

東臺瞑坐覺烏飛

道家有烏飛入兔宮之說

漫誇年少容吾在

樂天詩云

猶有誇張少年處笑呼張丈喚殷兄

若闢樽前舉世稀
待向松陽求水竹

一犁煙雨伴公歸

和三舍人省上

三月二十九日作
明日駕幸景靈宮

紛紛榮瘁何能久雲雨從來翻覆手恍如一夢墮枕中

却見三賢起江右

曾子開劉貢父孔經父皆江西人

嗟君妙質皆瑚璉

顧我虛名但箕斗明朝冠蓋蔚相望共覩翠輦朝宣光
武皇已老白雲鄉正與羣帝驂龍翔獨留杞梓扶明堂

送錢承制赴廣南路分都監

當年我作表忠碑坐覺江山氣未衰舞鳳尚從天目下
收駒時有渥洼姿踞牀到處堪吹笛橫槊何人解賦詩
知是丹霞破佛手先聲應已懾羣夷

廣西僧寺頃有佛動之異錢君碎而

投之
江中

次韻曾子開從駕二首

槐街綠闇雨初勻，瑞霧香風滿後塵。
清廟幸同觀濟濟，豐年喜復接陳陳。
雍容已饜天庖賜，俯伏初嘗貢茗新。
輦路歸來聞好語，共驚堯顙類高辛。

入仗魂驚愧草萊，一聲清蹕九門開。
暉暉日傍金輿轉，習習風從玉宇來。
流落生還真一芥，周章危立近三槐。
學士班近執政道傍儻有山中舊，問我收身早晚回。

再和

眼花錯莫鬢霜勻病馬羸騶只自塵奉引拾遺叨侍從
思歸少傳羨朱陳衰年壯觀空驚目嶮韻清詩苦鬪新
最後數篇君莫厭擣殘椒桂有餘辛

憶觀滄海過東萊日照三山迤邐開桂觀飛樓凌霧起
仙幢寶蓋拂天來不聞宮漏催晨箭但覺簷陰轉古槐
供奉清班非老處會稽何日乞方回

時方闕
會稽守

次韻劉貢父省上喜雨

密雲今日破郊西疎雨瀟瀟未作泥要及清閒同笑語
行看衰病費扶攜花前白酒傾雲液戶外青驄響月題
不用臨風苦揮淚君家自與竹林齊

貢父詩中有不及
與其兄原父同時

之歎然其兄子仲
馮今為起居舍人

再和

當年曹守我膠西共厭餉糟與汨泥自古赤丸成習俗
因公黃犢免提攜生還各有青山興病起猶能小字題
莫怪歌呼數相和魯將獄市寄全齊

貢父為曹州盜賊
皆奔秦境蓋嘗有

詩云從教晉

盜稍奔秦

送顧子敦奉使河朔

我友顧子敦，軀膽兩俊偉。便便十圍腹，不但貯書史。容
君數百人，一笑萬事已。十年卧江海，了不見愠喜。磨刀
向豬羊，醜酒會鄰里。歸來如一夢，豐頰愈茂美。平生批
敕手，濃墨寫黃紙。會當勒燕然，廊廟登劔履。翻然向河
朔，坐念東郡水。河來屹不去，如尊乃勇耳。

次韻子由送家退翁知懷安軍

吾州同年友祭若琴上星當時功名意豈止拾紫青事

既喜違願天或不假齡今如圖中鶴俛仰在一庭

吾州同年

友十三人今存者六人而已故有琴上星圖中鶴之語

西南正春早廢沼黏枯萍

翩然一麾去想見靈雨零我無謫仙句待詔沉香亭空
騎內廐馬天仗隨雲駢竟無絲毫補脊焉誰汝令永愧
舊山叟憑君寄丁寧

諸公餞子敦軾以病不往復次前韻

君為江南英面作河朔偉人間一好漢誰似張長史上

書苦留君言拙輒報已置之勿復道出處俱可喜攀與
共六尺食肉飛萬里誰言遠近殊等是朝廷美遥知送
別處醉墨爭淋紙我以病杜門商頌空振履後會知何
日一歡如覆水善保千金軀前言戲之耳

和張昌言喜雨

二聖憂懃忘寢食百神奔走會風雲禁林夜直鳴江瀨
清洛朝回起縠紋夢覺酒醒聞好句帳空簾冷發餘薰
秋來定有豐年喜刺作新詩準備君

次韻劉貢父西省種竹

要知西掖承平事記取劉郎種竹初舊德終呼名字外

後生誰續笑談餘

昔李公擇種竹館中戲語同舍後人指此竹必云李文正手植貢父笑曰

丈正不獨繫筆亦知種竹耶時有筆工李文正成陰障日行當見取荀供庖計

已疎白首林間望天上平安時報故人書

李衛公北都童子寺竹寺

僧日報
平安

偶與客飲孔常父見訪方設席延請忽上馬馳

去已而有詩戲用其前韻答之

揚雄他文不皆奇獨稱觀餅居井眉酒客法士兩小兒
陳遵張竦魯何知主人有酒君獨醉蟹螯何不左手持
豈復見吾橫氣機遣人追君君絕馳盡力去花君自癡
醅醕與酒同一卮請君更問文殊師

次韻子由書李伯時所藏韓幹馬

潭潭古屋雲幕垂省中文書如亂絲忽見伯時畫天馬
朔風胡沙生落錐天馬西來從西極勢與落日爭分馳
龍膺豹股頭八尺奮迅不受人間羈元狩虎脊聊可友

開元玉花何足奇，伯時有道真吏隱。飲啄不羨山梁雌，丹青弄筆聊爾耳。意在萬里誰知之，幹惟畫肉不畫骨。而況失實空餘皮，煩君巧說腹中事。妙語欲遣黃泉知，君不見韓生自言無所學。廐馬萬匹皆吾師。

次韻劉貢父獨直省中

明窓畏日曉先曠，高柳鳴蜩午更喧。筆老新詩疑有物，心空客疾本無根。隔牆我亦眠風榻，上馬君先瑣月軒。共喜早歸三伏近，解衣盤礴亦君恩。

軾以去歲春夏侍立邇英而秋冬之交子由相
繼入侍次韻絕句四首各述所懷

瞳瞳日脚曉猶清細細槐花暖自零坐閱諸公半廊廟
時看黃色起天庭

僕射呂公門下韓公左
丞劉公皆自講席大用

上尊初破早朝寒茗盃仍沾講舌乾陞楯諸郎空雨立
故應慙悔不儒冠

兩鶴摧頽病不言年來相繼亦乘軒悞聞九奏聊飛舞
可得裴回為啄吞

微生偶脫風波地晚歲猶存鐵石心定是香山老居士

世緣終淺道根深

樂天自江州司馬除忠州刺史旋以主客郎中知制誥遂拜中書舍人軾

雖不敢自比然謫居黃州起知文登召為儀曹遂忝侍從出處老少大畧相似庶幾復享此翁晚節閒適之樂焉

送宋朝散知彭州迎侍二親

東來誰迎使君車知是丈人屋上烏丈人今年二毛初
登樓上馬不用扶使君負弩為前驅蜀人不復談相如
老幼化服一事無有鞭不施安用蒲春波如天漲平湖
鞵紅照坐香生膚卷韞上壽白玉壺公堂登歌鳳將雛

諸孫懽笑爭挽鬚蜀人畫作西湖圖

郭熙畫秋山平遠

潞公為
跋尾

王堂畫掩春日閒中有郭熙畫春山鳴鳩乳燕初睡起
白波青嶂非人間離離短幅開平遠漠漠疎林寄秋晚
恰似江南送客時中流回頭望雲巘伊川佚老鬢如霜
卧看秋山思洛陽為君紙尾作行草烟如嵩洛浮秋光
我從公遊如一日不覺青山暎黃髮為畫龍門八節灘
待向伊川買泉石

次韻張昌言喜雨

千里黃流失故居年來赤地到青徐
遙聞爭誦十行語無異親巡六尺輿
精貫天人一言足雲興嶽瀆萬靈趨
愛君誰似元和老賀雨詩成即諫書

書晁補之所藏與可畫竹三首

與可畫竹時見竹不見人豈獨不見人
嗒然遺其身其身與竹化無窮出清新
莊周世無有誰知此凝神

若人今已無此竹寧復有邵將春蚓筆
畫作風中柳君

看斷崖上瘦節蛟蛇走何時此霜竿復入江湖手

晁子拙生事舉家聞食粥朝來又絕倒說墓得霜竹可

憐先生槃朝日照苜蓿吾詩固云爾可使食無肉

吾舊詩云

可使食無肉
不可居無竹

戲用晁補之韻

昔我嘗陪醉翁醉今君但吟詩老詩清詩咀嚼那得飽

瘦竹瀟灑令人饑試問鳳凰饑食竹何如鴛馬肥苜蓿

知君忍饑空誦詩口頰瀾翻如布穀

書皇親畫扇

十年江海寄浮沉夢遶江南黃葦林誰謂風流貴公子
筆端還有五湖心

書李世南所畫秋景

野水參差落漲痕疎林歌倒出霜根扁舟一棹歸何處
家在江南黃葉村

人間斤斧日創夷誰見龍蛇百尺姿不是溪山曾獨往
何人解作掛猿枝

書鄢陵王主簿所畫折枝二首

論畫以形似見與兒童鄰賦詩必此詩定非知詩人詩
畫本一律天工與清新邊鸞雀寫生趙昌花傳神何如
此兩幅疎澹含精勻誰言一點紅解寄無邊春

瘦竹如幽人幽花如處女低昂枝上雀搖蕩花間雨雙
翎決將起衆葉紛自舉可憐採花蜂清蜜寄兩股若人
富天巧春色入毫楮懸知君能詩寄聲求妙語

昨見韓丞相言王定國今日玉堂獨坐有懷其

人

畫卧玉堂上微風舉輕紈銅餅下碧井百尺鳴飛瀾
俛仰清夢餘愛此一掬寒似予平生友苦語涼肺肝秀眉
玉兩頰矯矯如翔鸞置之江淮交清詩洗江湍紅鱗對
白酒信美非所安丞相功業成還家酒盃寬人間有此
客折簡呼不難相將扣東閣起舞盡餘歡

和張來高麗松扇

可憐堂堂十八公老死不入明光宮萬牛不來難自獻

裁作團團手中扇屈身蒙垢君一洗挂名君家詩集裏
猶勝漢宮悲婕妤網蟲不見乘鸞子

故李承之待制六丈挽詞

青青一寸松中有梁棟姿天驥墮地走萬里端可期世
無阿房宮可建五丈旗又無穆天子西征燕瑤池才大
古難用老死亦其宜丈夫恐不免豈患莫已知公如松
與驥少小稱偉奇俯仰自廊廟笑談無羗夷清朝竟不
用白首仍憂時願斬橫行將請烹乾沒兒言雖不見省

坐折姦雄窺嗟我去公久江湖生白髭歸來耆舊盡零
落存者誰比公嵇中散龍性不可羈疑公李北海慷慨
多雄詞淒涼五君詠沉痛八哀詩邪正久乃明人今屬
公思九原不可傳千古有餘悲

次韻孔常父送張天覺河東提刑

送君應典鸛鷖裘憑仗千鍾洗別愁脫帽風流餘長史

君喜草書而不工故以此為戲

埋輪家世本留侯

張綱子房七世孫也健為武陽人墓在今

彭山君豈其後耶

子河駿馬方爭出

麟府馬出子河泌

昭義疲兵亦少

休

唐福昭義步兵
蓋澤潞弓箭手

定向秋山得嘉句故關黃葉滿行舟


送天覺得山字

西登太行嶺北望清涼山晴空浮五髻
庵鵲卿雲間餘光入巖石神草出茅管
何人相指似稍稍落人寰能令墜指兒
虬髯茁水顏祝君如此草為民已痼瘵
我亦老且病眼花腰脚頑念當勤致此
莫作河東慳

次韻王定國倅揚州

此身江海寄天遊一落紅塵不易收
未許相如還蜀道

空教何遜在揚州又驚白酒催黃菊尚喜朱顏映黑頭
火急著書千古事虞卿應未厭窮愁



東坡全集卷十六